

**L I G J**  
**Nr.8450, datë 24.2.1999**  
**PER PERPUNIMIN, TRANSPORTIMIN DHE TREGTIMIN E NAFTAES,**  
**TË GAZIT DHE NENPRODUKTEVE TË TYRE,**

*I NDRYSHUAR ME:*

LIGJIN Nr.9218, datë 08.04.2004  
LIGJIN Nr.9574, datë 03.07.2006  
LIGJIN Nr.9595, datë 27.07.2006  
LIGJIN Nr. 83/2013  
LIGJIN Nr.10137, datë 11.05.2009  
LIGJIN Nr. 12/2013  
LIGJIN Nr. 71/2014

Në mbështetje të neneve 78 dhe 83 pika 1 të Kushtetutës me propozimin e Këshillit të Ministrave,

**K U V E N D I**  
**I REPUBLIKES SE SHQIPERISE**  
**V E N D O S I:**  
**K R E U I**  
**DISPOZITA TË PERGJITHSHME**

Neni 1

Shteti përcakton politiken e zhvillimit të veprimtarive në fushën e përpunimit, transportimit dhe tregtimit të naftës, gazit dhe nënprodukteve të tyre, si dhe ushtron funksionin e tij rregullator, në përputhje me nevojat e vendit, të mbrojtjes kombëtare dhe të sigurimit publik, duke respektuar parimet e ekonomisë së tregut.

Neni 1/1

Përkufizime

Në këtë ligj dhe në aktet nënligjore në zbatim të tij termat e mëposhtëm kanë këto kuptime:

1. "Naftë bruto (naftë)" ka të njëjtin kuptim, sipas përkufizimit të dhënë në ligjin nr. 7746, datë 28.7.1993, "Për hidrokarburet (kërkimi dhe prodhimi)", të ndryshuar.

2. "Nënproduktet e naftës" janë produktet e gatshme apo gjysmë të gatshme, të përfutuara nga përpunimi i naftës bruto.

3. "GLN" është gazi i lëngshëm i naftës, si nënprodukt i naftës.

4. "Përpunim" është procesi i distilimit dhe rafinimit që përdor si lëndë të parë naftën bruto ose nënproduktet e saj, për përfitim të produkteve përfundimtare.

5. "Rafineri" janë instalime komplekse teknologjike, përfshirë edhe kapacitetet depozituese të lëndës së parë, të gjysmëprodukteve dhe produkteve të gatshme, ku kryhet përpunimi i naftës bruto apo nënprodukteve të saj për përfitim të nënprodukteve apo produkteve të gatshme.

6. "Impiant përpunimi" janë instalime teknologjike, ku kryhet përpunimi i nënprodukteve të naftës për përfitim të produkteve të gatshme.

7. "Transportim" është procesi i lëvizjes së naftës bruto apo nënprodukteve të saj nga një vend në një tjetër nëpërmjet tubacioneve dhe mjeteve të posaçme të transportit që përshkojnë një distancë të caktuar.

8. "Transportues" është personi, fizik apo juridik, që transporton naftën dhe nënproduktet e saj me anë të mjeteve specifike të autorizuara.

9. "Depozitim i naftës, gazit dhe nënprodukteve të tyre" është procesi i grumbullimit të naftës, gazit dhe nënprodukteve të tyre në rezervuarë të posaçme, nëpërmjet instalimeve teknologjike.

10. "Tregtim" është procesi i shitblerjes së naftës bruto dhe i nënprodukteve të saj nga një subjekt tek tjetri.

11. "Shoqëri tregtimi me shumicë" është personi juridik që blen naftë dhe nënproduktet e saj me qëllim shitjeje tek të tretët.

12. "Shoqëri tregtimi me pakicë" është personi juridik që blen nënprodukte të naftës, me qëllim shitjeje të personat që janë konsumatorë fundorë.

13. "Rezerva e sigurisë" është sasia e naftës dhe nënprodukteve të saj, e vendosur dhe e ruajtur në vende të caktuara, e cila përdoret sipas përcaktimeve të këtij ligji.

14. "Konsumatorë të mëdhenj" janë personat juridikë që konsumojnë për nevojat e veta nënproduktet e naftës në një sasi jo më pak se 50 m<sup>3</sup> në muaj dhe që posedojnë instalime depozitimi të këtyre produkteve.

15. "Konsumator fundor" është personi fizik apo juridik që blen produktet e gatshme për nevojat e veta.

16. "Standard i naftës bruto dhe nënprodukteve të saj" është tërësia e specifikimeve teknike të miratuara nga organet përgjegjëse që përcaktojnë cilësinë e tyre fiziko-kimike.

17. "Falsifikim" është ndërhyrje në nënproduktet e naftës, duke shtuar nënprodukte të tjera naftë apo produkte të tjera të huaja që prishin standardin fillestar të tyre.

18. "Terminale bregdetare" janë komplekse instalimesh teknologjike bregdetare për import-eksportin e naftës, gazit dhe nënproduktet e tyre, duke përfshirë pontilin e ankorimit të anijeve, depozitat, sistemin e ngarkim-shkarkimit dhe sistemet e trajtimit të mbetjeve teknologjike."

## Neni 2

Në zbatim të këtij ligji, ministria, që mbulon veprimtarinë e hidrokarbureve, është përfaqësuese e shtetit në fushën e përpunimit, transportimit dhe tregtimit të naftës, gazit dhe nënprodukteve të tyre.

Për ndjekjen dhe realizimin e dispozitave të këtij ligji, si dhe të ligjit nr.7746, datë 28.7.1993 "Për hidrokarburet" (kërkimi dhe prodhimi), me ndryshimet përkatëse, në ministri funksionon struktura përgjegjëse për veprimtarinë e hidrokarbureve.

## Neni 3

Dispozitave të këtij ligji u nënshtrohen, pa asnjë dallim, të gjithë personat juridike, publike ose private, vendas apo të huaj, që kanë si objekt të veprimtarisë së tyre përpunimin, transportimin e tregtimin e naftës, gazit dhe nënprodukteve të tyre.

Përrjashtimisht, Këshilli i Ministrave u jep personave juridike të caktuar, disa funksione apo kompetenca që i përkasin sektorit publik dhe që lidhen me zhvillimin e veprimtarive, objekt i këtij ligji.

## Neni 4

Veprimtaritë e përpunimit, transportimit dhe tregtimit të naftës, gazit e nënprodukteve të tyre, të përcaktuara në këtë ligj, përfshihen në kategorinë VIII.1, të shtojcës së ligjit për licencat. Licencimi i këtyre veprimtarive bëhet sipas ligjit për licencat ose sipas dispozitave në vijim, të këtij ligji. Këshilli i Ministrave vendos për përdorimin e njërës nga këto dy mënyra, sipas ndarjes në nënkategori. Në rastin e dytë, nuk zbatohet parimi i miratimit në heshtje.

## Neni 5

Ushtrimi i veprimtarive të parashikuara në kete ligj i nënshtrohet dispozitave të legjislacionit shqiptar për mbrojtjen e mjedisit.

## Neni 6

Importimi dhe eksportimi i naftës, gazit dhe nënprodukteve të tyre behet lirisht, nga dhe në cilindo shtet, në përputhje me dispozitat e këtij ligji dhe të marrëveshjeve ndërkombëtare të kësaj fushe, ku shteti ynë është pale, duke respektuar dobinë ekonomike.

## Neni 7

Këshilli i Ministrave ka kompetence liberalizimin e çmimeve të shitjes me pakicë të nënprodukteve të naftës dhe të gazit. Në situata të veçanta tregu, Këshilli i Ministrave mund të vendosë kufizime të përkohshme (çmime tavan apo dysheme) për çmimet e shitjes me pakicë të nënprodukteve të naftës e të gazit.

## Neni 8

Personat juridike, që ushtrojnë veprimtari në përputhje me kete ligj, janë të detyruar të paraqesin në ministri informacion për programin e zhvillimit, si dhe të dhënat periodike, që lidhen me realizimin e veprimtarisë së tyre. Lloji i të dhënave dhe informacionit, forma dhe afatet e dërgimit të tyre, nga personat juridike, përcaktohen kjo ministri.

Ministria përgjigjet për përpunimin dhe publikimin e këtij informacioni, duke përcaktuar formën, afatet dhe mënyrën e botimit.

## Neni 9

### Rezerva e sigurisë

1. Për mbulimin e nevojave të konsumit kombëtar në periudha krize dhe situatash të jashtëzakonshme brenda territorit të vendit, rafineritë e naftës dhe shoqëritë e tregtimit me shumicë janë të detyruara të mbajnë rezerva sigurie. Këshilli i Ministrave përcakton kategoritë e naftës dhe të nënprodukteve të saj, për të cilat duhet mbajtur rezerva e sigurisë.

2. Rafineritë e naftës dhe shoqëritë e tregtimit me shumicë të naftës, gazit natyror dhe nënprodukteve të tyre janë të detyruara të mbajnë rezerva sigurie, të barabarta me 30 dite mesatare shitjeje, sasi që llogaritet duke u mbështetur në të dhënat dhe rezultatet faktike të veprimtarisë së vitit të mëparshëm.

Duke filluar nga viti 2007 deri në vitin 2010 rezerva e sigurisë do të jetë e barabartë me 60 ditë mesatare shitjeje, ndërsa nga viti 2010 e në vazhdim rezerva e sigurisë do të jetë e barabartë me 90 ditë mesatare shitjeje.

3. Sasia e rezervës së sigurisë, që detyrohet të mbaje çdo rafineri naftë dhe çdo shoqëri tregtimi me shumicë, përcaktohet sipas kriterëve të mësipërme, me urdhër të ministrit. Struktura përgjegjëse për veprimtarinë e hidrokarbureve përgjigjet për kontrollin e sasive të rezervës së sigurisë në të gjitha subjektet.

Rafineritë e naftës dhe shoqëritë e tregtimit me shumicë detyrohen të plotësojnë sasinë përkatëse të rezervës së sigurisë, brenda 9 muajve nga hyrja në fuqi e këtij ligji.

4. Rafineritë e naftës, rezervën e sigurisë deri në 50 për qind të sasisë së saj, mund ta mbajnë edhe në formën e naftës bruto në rezervuarët e tyre apo në rezervuarët e shoqërive të prodhimit të naftës, me të cilat ato kanë kontrata furnizimi. Shoqëria e tregtimit me shumicë rezervën e sigurisë e mban në rezervuarët prone të shoqërisë apo të marra në përdorim prej saj në baze të një kontrate.

## Neni 10

Në kuptim të këtij ligji, nafta, gazi natyror dhe nënproduktet e tyre klasifikohen në kategori, si vijon:

Kategoria O

A. Nafta bruto

B. Gazi natyror

Kategoria I

A. Gazi i lëngshëm

Kategoria II

A. Benzine automjetesh

B. Benzine mjetesh të fluturimit ajror

C. Nënprodukte të tjera, të lëngshme si: benzol, toluol, ksilol, solven, white spirit.

Kategoria III

A. Gazoil (Diezel)

B. Vajguri ndriçues

C. Lende djegëse për mjetet e fluturimit ajror reaktive (kerozene)

Ç. Lëndë djegëse për përdorim termik civil dhe/ose industrial

Kategoria IV

A. Vajrat

B. Solare

Kategoria V

A. Bitum (asfalt)

B. Mazut

## KREU II

### PERSONAT JURIDIKE, QË USHTROJNE VEPRIMTARI TË PERPUNIMIT, TRANSPORTIMIT DHE TREGTIMIT TË NAFTES, GAZIT DHE NENPRODUKTEVE TË TYRE

#### Neni 11

Personat juridike, që i nënshtrohen këtij ligji, në përputhje me natyrën e veprimitarisë se ushtruar, klasifikohen si vijon:

a) rafineri naftë, që ushtrojnë veprimtari të përpunimit të naftës bruto;

b) naftësjellës e gazsjellës, që ushtrojnë veprimtarinë e transportimit të naftës bruto dhe të gazit natyror (kategoria O);

b/1) impiante të përpunimit

c) shoqëritë e tregtimit me shumicë, që ushtrojnë veprimtarinë e tregtimit me shumicë të naftës bruto, gazit dhe nënprodukteve të tyre dhe lëndëve që shërbejnë si lëndë djegëse;

ç) stacionet e shitjes së karburanteve, që ushtrojnë veprimtarinë e tregtimit të karburanteve për automjete, gazit të lëngshëm dhe vajrave lubrifikante;

d) njësitë e shitjes së lëndëve djegëse, që ushtrojnë veprimtarinë e tregtimit të tyre për përdorim nga konsumatorët fundorë.

## Neni 12

### Rafineritë e naftës

1. Rafineritë e naftës janë persona juridike, të themeluara në formën e shoqërisë aksionare, të cilat me marrjen e licences se koncesionit, kryejnë veprimtari në përpunimin e naftës bruto, duke prodhuar nënprodukte të saj. Rafineritë e naftës për tregtimin e produkteve të tyre kanë të drejtë të formojnë shoqëri tregtimi me shumicë të nënprodukteve të naftës apo të zotërojnë aksione në një shoqëri të tillë. Në këto raste rafineritë e naftës duhet të respektojnë dispozitat lidhur me konkurrencën.

2. Rafineritë e naftës janë të detyruara të zbatojnë normat dhe kushtet teknike të projektit. Ndryshimet në skemën dhe kartën teknologjike të funksionimit të rafinerive bëhen vetëm me miratim të ministrisë përgjegjëse për hidrokarburet. Transferimi i licencës përkatëse të rafinerisë lejohet vetëm pas miratimit të ministrisë përgjegjëse për hidrokarburet, sipas kushteve dhe procedurës të parashikuar me vendim të Këshillit të Ministrave.

3. Rafineritë e naftës kanë të drejtë të përpunojnë naftë bruto të prodhimit të vendit ose me origjinë nga importi. Ato kanë të drejtë të realizojnë marrëveshje për furnizimin me naftë bruto me shoqëri prodhuese të naftës, me naftësjellës, me shoqëri të tregimit me shumicë, si dhe kanë të drejtë të realizojnë marrëveshje për importimin e naftës bruto.

4. Rafineritë e naftës kanë të drejtë t'i shesin prodhimet e tyre në vend, të shoqëritë e tregtimit me shumicë e impiantet e përpunimit, si dhe t'i eksportojnë në shtete të tjera.

5. Rafinerive të naftës u ndalohe të lidhin çfarëdo marrëveshje për furnizim të drejtpërdrejtë të stacioneve të shitjes se karburanteve, të njësive të shitjes se lendeve djegëse, të shoqërive që tregtojnë me pakicë apo shoqërive të papajisura me licence, sipas përcaktimeve të këtij ligji.

6. Rafineritë e naftës përgjigjen për markën e prodhimit dhe cilësinë e nënprodukteve të naftës të prodhuara prej tyre.

7. Rafineritë e naftës përgjigjen për respektimin e normave të përcaktuara në kete ligj, lidhur me rezervën e sigurisë.

## Neni 12/1

1. Impiantet e përpunimit janë persona juridikë, të krijuar sipas legjislacionit në fuqi, që ushtrojnë veprimtari në fushën e përpunimit të nënprodukteve të naftës. Ndërtimi dhe funksionimi i impianteve të përpunimit bëhet pasi ato të jenë pajisur me "Licencë përpunimi", të lëshuar nga ministria përgjegjëse për hidrokarburet, sipas procedurave dhe kushteve të përcaktuara me vendim të Këshillit të Ministrave.

2. Impiantet e përpunimit e zhvillojnë veprimtarinë e shitjes së prodhimeve të tyre vetë ose nëpërmjet një shoqërie tjetër tregtimi me shumicë, vetëm pas marrjes së licencës së tregtimit, sipas legjislacionit në fuqi.

3. Impiantet e përpunimit kanë të drejtë të tregtojnë prodhimet e tyre vetëm të shoqëritë e tregtimit me shumicë, shoqëritë e tregtimit me pakicë dhe konsumatorët e mëdhenj.

4. Impiantet e përpunimit përgjigjen për markën e prodhimit dhe cilësinë e produkteve që prodhojnë.

5. Subjektet zotëruese të impianteve të përpunimit kanë të drejtë të themelojnë apo të marrin pjesë në shoqëritë që ushtrojnë veprimtarinë e tregtimit me pakicë të prodhimeve të tyre.”.

### Neni 13

#### Naftësjellësit, gazsjellësit

1. Naftësjellësit dhe gazsjellësit janë persona juridike të themeluar si shoqëri aksionare, që, në baze të licences se koncesionit, kanë të drejtë të realizojnë veprimtari të importimit, eksportimit dhe transportimit me ane të instalimeve të tyre të naftës bruto dhe gazit natyror, të vendit ose të importit, deri në vendin përcaktuar të pranimit nga rafineritë e naftës ose shoqëritë e tregtimit me shumicë. Instalimet e naftësjellësve dhe gazsjellësve përfshijnë linjat (tubacionet), rezervuarët e magazinimit (stokimit) dhe pajisjet e tjera, që shërbejnë për transportimin dhe trajtimin e fluidit.

2. Ndërtimi i naftësjellësve dhe gazsjellësve për transportimin, importimin dhe eksportimin e naftës bruto dhe të gazit natyror, behet me vendim të Këshillit të Ministrave. Subjektet juridike që ushtrojnë veprimtarinë e transportimit të naftës dhe nënprodukteve të saj, me naftësjellës, janë të detyruara që çdo pesë vjet të hartojnë një plan të detajuar për mirëmbajtjen e kapaciteteve ekzistuese, si dhe të bëjnë shfrytëzimin e instalimeve, në përputhje me rregullat dhe standardet teknike të përcaktuara në legjislacionin në fuqi

3. Personat juridike, që ushtrojnë veprimtari të prodhimit në vend të naftës bruto dhe të gazit natyror, kanë të drejtë të ndërtojnë instalimet përkatëse dhe të ushtrojnë veprimtari të transportimit, në përputhje me dispozitat e ligjit nr.7746, datë 28.7.1993 "Për hidrokarburet" (kërkimi dhe prodhimi).

4. Transportimi i naftës bruto dhe i gazit natyror për import a eksport realizohet nëpërmjet kontratave që sigurojnë furnizimin e vazhduar shumëvjeçar të konsumatoreve. Një kopje e këtyre kontratave, brenda 10 ditëve nga data e lidhjes se saj, depozitohet në strukturën pergjegjese per veprimtarine e hidrokarbureve.

### Neni 14

#### Shoqëritë e tregtimit me shumicë

1. Veprimtaria e tregtimit me shumicë të naftës bruto, gazit natyror dhe nënprodukteve të tyre, të vendit a të importit, ushtrohet nga shoqëritë e tregtimit me shumicë. Përfshirë nga ky rregull bëjnë: a. personat juridike që prodhojnë hidrokarbure në baze të ligjit nr.7746, datë 28.7.1993 "Për hidrokarburet" (kërkimi dhe prodhimi), të cilët kanë edhe të drejtën e tregimit të prodhimit të tyre vetëm në rafineritë e naftës, eksport dhe të shoqëritë e pajisura me licencë tregtimi të

kategorisë 0/A.; b. rafineritë e naftës të cilat do të tregtojnë prodhimet e tyre. c) impiantet e përpunimit që do të tregtojnë prodhimet e tyre. Shoqëritë e tregtimit me shumicë kanë të drejtë ta ushtrojnë veprimtarinë e tyre në të gjithë ose në një pjesë të territorit të vendit. Këto shoqëri disponojnë impiante për depozitimin e naftës, gazit dhe nënprodukteve të tjera dhe përgjigjen për funksionimin e këtyre impianteve, në përputhje me normat teknike të miratuara nga ministria dhe masat e Mbrojtjes Nga Zjarri (MNZ).

2. Tregtimi me shumicë i naftës, gazit dhe nënprodukteve të tjera ushtrohet vetëm nga shoqëritë tregtare, të themeluara në formën e shoqerive aksionare, pasi të jenë pajisur me leje tregtimi, sipas dispozitave të këtij ligji.

3. Shoqëritë e tregtimit me shumicë kanë të drejtë të themelojnë apo të marrin pjesë në shoqëri që ushtrojnë veprimtari si stacione të shitjes së karburanteve apo njësi të lendeve djegëse.

4. Shoqëria e tregtimit me shumicë përgjigjet për sasinë dhe cilësinë e ngarkesës gjatë transportit.

5. Shoqëritë e tregtimit me shumicë janë të detyruara të garantojnë furnizim normal dhe jodiskriminues, në përputhje me nevojat që kanë subjektet e përcaktuara në pikën 7, me të cilët ka lidhur kontratë. Në zbatim të këtij detyrimi ato duhet të mbajnë dokumentacion të veçantë, sipas përcaktimeve të bëra nga Ministri i Financave dhe ministri përgjegjës për hidrokarburet.

6. Shoqëritë e tregtimit me shumicë e realizojnë veprimtarinë e tyre në tregun e brendshëm, si dhe eksportimin e importimin e naftës, gazit dhe nënprodukteve të tyre nëpërmjet kontratës. Kryerja e pagesave për importet dhe eksportet, shlyerja e detyrimeve të tjera kontraktore, si dhe çdo detyrim doganor e fiskal, që lidhet me këto shoqëri, behet nëpërmjet dokumentacionit bankar.

7. Shoqëritë e tregtimit me shumicë kanë të drejtë të furnizojnë, sipas kushteve të licencës përkatëse, rafineritë e naftës, impiantet e përpunimit, shoqëritë e tregtimit me pakicë, të pajisura me licencë tregtimi, mjetet detare dhe ajrore, si dhe konsumatorët e mëdhenj.

8. Shoqëritë e tregtimit me shumicë përgjigjen për dërgimin në ministri në afatet e caktuara të informacionit të kërkuar për veprimtarinë e tyre.

9. Shoqëritë e tregtimit me shumicë përgjigjen për markën e produktit dhe cilësinë e nënprodukteve të naftës dhe gazit që tregtojnë. Ato kanë të drejtë të ushtrojnë kontroll në stacionet e shitjes së karburanteve apo në njësitë e shitjes së lendeve djegëse të furnizuara prej tyre, me qëllim të garantimit të cilësisë së nënprodukteve të naftës dhe gazit, që u ofrohen konsumatoreve.

Shoqëritë e tregtimit me shumicë shoqërojnë çdo produkt me certifikatë cilësie dhe mostër përfaqësuese të sekretuar, sipas kritereve të përcaktuara nga ministri përgjegjës për hidrokarburet.

10. Shoqëritë e tregtimit me shumicë përgjigjen për respektimin e normave të përcaktuara në kete ligj, lidhur me rezervën e sigurisë.

11. Shoqërite aksionare të pajisura me leje tregtimi, që ndryshojnë emrin e subjektit juridik, kanë të drejtë të bëjnë shtesa ose ndryshim kategorie, brenda të njëjtit lloj lejeje, duke respektuar afatin e lejes së mëparshme dhe duke plotësuar, për secilën



kategori, kushtet dhe normat teknike, të vërtetuara nga Inspektorati Shtetëror i Kontrollit të Naftës, Gazit dhe Nënprodukteve të tyre.

12. Futja në treg dhe përdorimi i pajisjeve nën presion, që shërbejnë për trajtimin dhe ambalazhimin e gazit të lëngshëm të naftës (GLN) nga shoqëritë e tregtimit me shumicë të këtij nënprodukti, bëhet vetëm kur ato plotësojnë kushtet teknike dhe kërkesat e përcaktuara në legjislacionin në fuqi.

Shoqëritë e tregtimit me shumicë të gazit të lëngshëm të naftës përgjigjen për kryerjen e kontrollit teknik dhe mbushjen e bombolave me GLN.

Shoqëritë e tregtimit me shumicë, përpara futjes së bombolave në treg, bëjnë evidentimin e tyre për markën tregtare të shoqërisë, peshën neto, peshën bruto, vitin e prodhimit, datën e kontrollit teknik, si dhe udhëzimin për përdorim të sigurt të tyre

13. Shoqërive të tregtimit me shumicë u ndalohet që të shesin të subjekte të tjera produkte, në të cilat është kryer falsifikim.

## Neni 15

### Stacionet e shitjes se karburanteve

1. Veprimtaria e tregtimit me pakicë të karburanteve, gazit të lëngshëm për automjete dhe vajrave lubrifikante, ku përfshihen nënproduktet e kategorive I, II, III dhe IV/A, kryhet nga stacionet e shitjes së karburanteve. Me përjashtim të nënproduktit të kategorisë IV/A, nënproduktet e tjera tregtohen vetëm nëpërmjet aparateve të matjes dhe të regjistrimit të sasisë së shitjes. Stacionet e shitjes së karburanteve, gazit të lëngshëm për automjete dhe vajrave lubrifikante ndalohen të mbushin bombola me gaz të lëngshëm për përdorim shtëpiak apo tregtar.

Stacionet e shitjes se karburanteve janë persona juridike, që themelohen në një nga format e shoqërive të parashikuara nga legjislacioni tregtar.

Stacionet e shitjes se karburanteve lejohen të ushtrojnë veprimtarinë e tyre vetëm pasi të jenë pajisur nga organi kompetent me licencën përkatëse, sipas këtij ligji, me kusht që ndërtimi i instalimeve dhe funksionimi i tyre gjate ushtrimit të veprimtarisë të jenë në përputhje me kushtet teknike të përcaktuara nga ministria.

2. Stacionet e shitjes se karburanteve janë të detyruara të furnizohen vetëm nga shoqëritë e tregtimit me shumicë, të licencuara sipas këtij ligji, në baze të kontratave të lidhura ndërmjet tyre.

3. Stacionet e shitjes se karburanteve, mbështetur në llojin e marrëveshjes tregtare të bashkëpunimit me shoqëritë e tregtimit me shumicë, klasifikohen si vijon:

- Stacione që furnizohen ekskluzivisht nga një shoqëri tregtimi me shumicë, të cilat janë të detyruara të mbajnë markën e saj tregtare. Këto stacione, për ekspozimin e markës se shoqërisë se tregtimit me shumicë dhe për informimin e konsumatoreve, janë të detyruara të vendosin tabela të dukshme e të dallueshme qarte nga distanca. Deri në përfundim të afatit të marrëveshjes tregtare të bashkëpunimit ekskluziv, përkatës, këtyre stacioneve u ndalohet të furnizohen me karburante të shoqërive të tjera të tregtimit me shumicë, qofte drejtpërdrejt ose tërthoras;

- stacionet të quajtura të bardha, nuk kanë veprimtari të mbështetur në një marrëveshje tregtare bashkëpunimi ekskluziv me një shoqëri tregtimi me shumicë. Këto stacione kanë të drejtë të mbajnë markën e tyre të posaçme tregtare. Rregullat për mbajtjen e një marke të posaçme përcaktohen nga ministri përgjegjës për hidrokarburet. Stacioni i shitjes së karburanteve është i detyruar që, brenda 10 ditëve nga data e nënshkrimit, të depozitojë në strukturën përgjegjëse për veprimtarinë hidrokarbure një kopje të marrëveshjes tregtare të bashkëpunimit ekskluziv.

**4. Stacioneve të shitjes së karburanteve u ndalohet të tregtojnë karburante për mjete transporti, detar e ajror, si dhe lende djegëse të lëngëta apo të gazta.**

5. Në çdo stacion të shitjes së karburanteve duhet të jenë të ekspozuara, në mënyrë të dukshme dhe të qarte llojet e karburanteve që tregtojnë, çmimet e tyre, koha e punës dhe shërbimet e tjera që kryhen nga stacioni.

6. Stacionet e shitjes së karburanteve përgjigjen për cilësinë e karburanteve, duke ruajtur për këto qëllim edhe kampionet përkatëse të karburanteve, të furnizuara nga shoqëritë e tregtimit me shumicë.

7. Në çdo stacion të shitjes së karburanteve mbahet dokumentacioni, në përputhje me normat e përcaktuara nga struktura përgjegjëse që mbulon veprimtarinë e hidrokarbureve.

8. Stacioneve të shitjes së karburanteve u ndalohet që të shesin të subjekte të tjera produkte, në të cilat është kryer falsifikim.

9. Stacioneve të shitjes së karburanteve u ndalohet vendosja e markave, logove dhe sloganeve të peregjistruara paraprakisht në Drejtorinë e Përgjithshme të Patentave dhe Markave, në përputhje me ligjin nr. 9947, datë 7.7.2008, "Për pronësinë industriale", të ndryshuar.

10. Stacioneve të shitjes së karburanteve u ndalohet të shkruajnë emra artikujsh të ndryshëm nga ata që shesin realisht dhe të vendosura sipas standardeve të parashikuara në legjislacion në fuqi. Këto stacione duhet të vërtetojnë me dokumentacion përkatës që produkti apo shërbimi që ofrojnë i përket markës dhe standardit që reklamojnë.

## Neni 16

### Njësitë e lendeve djegëse

**1. Veprimtaria e tregtimit me pakicë të lëndëve djegëse për ngrohje dhe gatim për konsumatorët kryhet nga stacionet dhe njësitë e lëndëve djegëse.**

Njësitë e shitjes së lendeve djegëse janë vetëm persona juridike, të themeluar në njëri nga format e shoqërive të parashikuara nga legjislacioni shqiptar.

Njësitë e shitjes së lendeve djegëse lejohen të ushtrojnë veprimtarinë e tyre pasi të jenë pajisur nga organi kompetent me licencën përkatëse sipas këtij ligji.

**Njësitë të shitjes së lëndëve djegëse u ndalohet të mbushin bombola gazi, të tregtojnë karburante për automjete, si dhe të ushtrojnë veprimtarinë e tyre pranë stacioneve të shitjes së karburanteve.**

2. Instalimet e njësive të lendeve djegëse, që përfshijnë pajisjet e depozitimit dhe ato të shitjes, dhe funksionimi i këtyre njësive duhet të jenë në përputhje me normat teknike të përcaktuara nga ministria dhe me rregullat e MNZ-se.

3. Njësitë e shitjes se lendeve djegëse janë të detyruara që furnizimin e tyre ta bëjnë vetëm nga shoqëritë e tregtimit me shumicë, të licencuara sipas këtij ligji. Ato përgjigjen për cilësinë e produkteve që tregtojnë

4. Në njësitë e shitjes se lendeve djegëse duhet të jenë të ekspozuar informacioni për llojet e lendeve djegëse për ngrohje që tregtojnë, çmimet e tyre, koha e punës dhe shërbimet e tjera që kryhen nga njësia.

5. Njësitë e tregtimit me pakicë të bombolave të gazit të lëngshëm të naftës janë të detyruara të respektojnë kushtet dhe rregullat teknike për përpunimin e këtyre bombolave, të përcaktuara me vendim të Këshillit të Ministrave.

6. Njësive të shitjes së lëndëve djegëse u ndalohet që të shesin të subjekte të tjera produkte, në të cilat është kryer falsifikim.

### KREU III

#### LEJA E KONCESIONIT, LICENCA E TREGTIMIT, LICENCA DHE PROCEDURA E DHENIES SE TYRE

##### Neni 17

Personat juridike që ushtrojnë veprimtari të përpunimit, transportimit dhe tregtimit të naftës bruto, gazit natyror dhe nënprodukteve të tyre, përpara fillimit të ushtrimit të veprimtarisë përkatëse janë të detyruar të pajisen me licence koncesioni, licence përpunimi, licence tregtimi ose licencë.

##### Neni 18

###### Leja e koncesionit

1. Leja e koncesionit u jepet personave juridike, të parashikuar në pikat "a" dhe "b" të nenit 11 të këtij ligji.

2. Leja e koncesionit jepet me vendim të Këshillit të Ministrave përpara fillimit të punimeve për ndërtimin e instalimeve, për një periudhë deri në 30 vjet me të drejtë përsëritjeje.

3. Kushtet dhe procedurat për dhënien e lejeve të koncesionit përcaktohen me vendim të Këshillit të Ministrave.

##### Neni 18/1

###### Licenca e përpunimit

1. Licenca e përpunimit u jepet personave juridikë, të përcaktuar në shkronjën "b/1", të nenit 11, të këtij ligji.

2. Licenca e përpunimit jepet nga ministri përgjegjës për hidrokarburet, sipas kushteve dhe procedurave të këtij ligji dhe vendimit të miratuar nga Këshilli i Ministrave.

3. Licenca e përpunimit jepet për 15 vjet, me të drejtë rinovimi.

## Neni 19

### Licenca e tregtimit

1. Licenca e tregtimit u jepet personave juridike të parashikuar në pikën "c" të nenit 11 të këtij ligji, të cilët ushtrojnë veprimtarinë e tregtimit të naftës dhe gazit dhe nënprodukteve të tyre, për kategoritë përkatëse, të parashikuara në nenin 10.

2. Licenca e tregtimit ndahen në tri lloje, si vijon:

a. Licenca e tregtimit, e llojit A:

Licence tregtimi për shoqëritë që tregtojnë produkte të kategorisë 0, II, III, IV dhe V, me përjashtim të nënprodukteve që destinohen për furnizimin e mjeteve të fluturimit ajror.

b. Licence e tregtimit, e llojit B:

Licence tregtimi për shoqëritë që tregtojnë produkte të kategorisë I (gaz i lëngshëm).

c. Licence e tregtimit, e llojit C:

Licence tregtimi për shoqëritë që tregtojnë karburante për mjetet e fluturimit ajror.

3. Licence e tregtimit të llojit A, B, C jepen nga ministri përgjegjës për hidrokarburet, sipas kriterëve dhe procedurave të parashikuara në kete ligj dhe të akteve nënligjore të nxjerra në baze dhe për zbatim të tij nga Këshilli i Ministrave.

4. Licence e tregtimit jepen me afat 10 vjet me të drejtë rinovimi.

## Neni 20

### Licencat

1. Licencat u jepen personave juridike, të parashikuar në pikat "ç" dhe "d", të nenit 11 të këtij ligji, të cilët ushtrojnë veprimtarinë e tyre për tregtimin e karburanteve, gazit të lëngshëm të naftës dhe vajrave lubrifikante për automjete (stacionet e shitjes së karburanteve) dhe për shitjen e lendeve djegëse (njësitë e shitjes së lendeve djegëse).

2. Licencat për personat juridike, që ushtrojnë veprimtaritë e parashikuara në pikat "ç" dhe "d" të nenit 11, jepen nga organi i pushtetit vendor për një periudhë deri në 5 vjet me të drejtë përsëritjeje.

3. Licencat për personat juridike, që ushtrojnë veprimtarinë e stacionit të karburanteve të ndërtuara në autostrada, jepen nga ministri përgjegjës për transportin, për një periudhë deri në 10 vjet, me të drejtë përsëritjeje.

4. Kriteret dhe procedurat për dhënien e licencave përcaktohen nga Këshilli i Ministrave.

#### Neni 21

##### Kushtet e dhënies së licencës së tregtimit

Personat juridikë, që paraqesin kërkesë për licence tregtimi, sipas nenit 19 të këtij ligji, janë të detyruar të plotësojnë kushtin e kapacitetit të depozitimit në instalimet, prona të tyre ose të marra në përdorim me kontratë, për një periudhë kohore të barabartë me atë të vlefshmërisë së licences së tregtimit. Kushtet e dhënies së licences së tregtimit përcaktohen nga Këshilli i Ministrave. Kushti i kapacitetit të depozitimit specifikohet, sipas llojit të licences dhe kategorisë së produkteve që tregtojnë.

#### KREU IV

#### KONTROLLI MBI PERSONAT JURIDIKE, QË USHTROJNE VEPRIMTARI TË PERPUNIMIT, TRANSPORTIMIT DHE TREGTIMIT TË NAFTES, GAZIT DHE NENPRODUKTEVE TË TYRE

#### Neni 22

Shteti organizon dhe ushtron kontroll në personat juridike që veprojnë në fushën e përpunimit, transportimit dhe tregtimit të naftës, gazit dhe nënprodukteve të tyre. Drejtimet kryesore të këtij kontrolli janë :

- Respektimi i normave teknike dhe i masave të mbrojtjes nga zjarri në instalimet, impiantet dhe pajisje që përdoren nga persona juridike;
- respektimi i treguesve cilësore i standardeve ligjore dhe dispozitave të tjera ligjore e nënligjore, në parandalimin e abuzimeve dhe falsifikimeve që mund të kryhen nga persona juridike;
- respektimi i dispozitave ligjore e nënligjore, lidhur me rezultatet financiare dhe plotësimin të detyrimeve fiskale të personave juridike ndaj shtetit.

#### Neni 23

##### Inspektorati Shtetëror Pergjegjës

1. Organi shtetëror, i specializuar për kontrollin e veprimtarisë së personave juridikë, të ushtruar në përputhje me dispozitat e këtij ligji, është Inspektorati Shtetëror Pergjegjës, që funksionon dhe varet nga ministri pergjegjës për hidrokarburet. Ky inspektorat mbështetet në kryerjen e funksioneve të tij nga laboratorë të akredituar për fushën dhe testet përkatëse. Këta laboratorë mund të jenë pjesë e këtij inspektorati ose jashtë tij. Për çdo rast testimi, duhet të ruhet fshehtësia e mostrës."

2.a) Inspektorati shtetëror pergjegjës ka të drejtë dhe pergjigjet për:

- i) kontrollin e zbatimit të normave dhe kushteve teknike në përdorimin e instalimeve, impianteve dhe pajisjeve përkatëse nga personat juridikë, që kryejnë veprimtari në përputhje me dispozitat e këtij ligji;
- ii) miratimin e kartave teknologjike të impianteve dhe instalimeve përkatëse;
- iii) kontrollin e zbatimit të kushteve të përcaktuara në licencat përkatëse, që u janë dhënë personave juridikë, përfshirë edhe kushtet teknike për mbrojtjen nga zjarri dhe ruajtjen e mjedisit;

iv) garantimin e së drejtës për informim të publikut dhe/ose subjekteve të interesuara mbi rezultatet e analizave të kontrollit të naftës, gazit dhe nënprodukteve të tyre, sipas procedurave dhe afateve të përcaktuara në ligjin nr. 8503, datë 30.6.1999, "Për të drejtën e informimit për dokumentet zyrtare". Rregullat për dhënien e informacionit për publikun dhe/ose subjektet e interesuara, miratohen nga ministri përgjegjës për hidrokarburet;

v) kontrollin e respektimit të standardeve apo rregullave shtetërore për cilësinë e naftës dhe nënprodukteve të saj;

vi) kryerjen e analizave në laboratorët e akredituar, sipas përcaktimit të pikës 1, për sasinë e naftës e nënprodukteve të saj të prodhuara në vend, të importuara, para zhdoganimit, si dhe për kontrollin periodik të detyrueshëm të subjekteve që kryejnë veprimtari në përputhje me dispozitat e këtij ligji;

vii) kontrollin e cilësisë së nënprodukteve të naftës të konsumatorët e mëdhenj. Shpenzimet për kontrollin e cilësisë së naftës e nënprodukteve të saj përballohen nga vetë subjektet:

- për rastin e futjes në territorin e Republikës së Shqipërisë;
- për rastin e kontrollit të cilësisë për sasinë e prodhuara në vend;
- për rastin e kontrolleve periodike të detyrueshme;
- për rastin kur rezultojnë shkelje në treguesit e cilësisë.

Tarifat e kontrolleve dhe afatet e kontrolleve periodike përcaktohen nga ministri përgjegjës për hidrokarburet. Në rastet e tjera zbatohen rregullat e parashikuara në ligjin nr. 10 433, datë 16.6.2011, "Për inspektimin në Republikën e Shqipërisë"

b) Për realizimin e këtyre detyrave Inspektorati Shtetëror Përgjegjës bashkëpunon me organet e tjera shtetërore dhe të qeverisjes vendore, që mbulojnë fushën e ndërtimit, të rendit publik, të veprimtarisë tregtare, të mbrojtjes nga zjarri dhe të ruajtjes së mjedisit.

3. Inspektimi për verifikimin e respektimit të kërkesave ligjore bëhet në përputhje me këtë ligj dhe ligjin për inspektimin.

#### Neni 24

Kontrolli nga organet doganore dhe tatimore

Ministria e Financave, me strukturat e saj të organeve tatimore e doganore, organizon dhe ushtron kontroll ndaj personave juridike që i nënshtrohen këtij ligji, lidhur me respektimin e dispozitave ligjore, që lidhen me rezultatin financiar të tyre dhe plotësimin e detyrimeve fiskale e doganore ndaj shtetit, për kontrollin e treguesve cilësorë e sasiore, si dhe të normave të tjera ligjore e nënligjore për parandalimin e abuzimeve e falsifikimeve, që nga çasti i hyrjes së mallit në pikat doganore, deri në procesin përfundimtar të shitjes së tyre.

Kontrolli i treguesve cilësorë për zhdoganimin e mallit bëhet nga Inspektorati Shtetëror Përgjegjës.

#### Neni 25

1. Shkeljet e mëposhtme, kur nuk përbëjnë vepër penale, përbëjnë kundërvajtje administrative dhe dënohen përkatësisht me gjobë dhe, sipas rastit, edhe me një ose disa dënime plotësuese, të përcaktuara në pikën 3 të këtij neni:

- a) për shkelje të kërkesave të nenit 8, nga 100 000 deri 150 000 lekë;
- b) për mosrespektim të sasisë së rezervës së sigurisë dhe të afateve të plotësimit të tyre, sipas nenit 9, deri në 50 për qind të vlerës së tregut të sasisë së produktit që mungon nga kuota e përcaktuar si rezervë sigurie;
- c) për shkelje të kërkesave të nenit 12, pika 5, 2 000 000 lekë;
- ç) për shkelje të kërkesave të nenit 12, pika 6, 5 000 000 lekë;
- d) për shkelje të kërkesave të nenit 12/1, pika 4, nga 1 500 000 deri në 2 000 000 lekë;
- dh) për tregtimin e naftës bruto të prodhuar nga shoqëritë që kryejnë veprimtari kërkimi e prodhimi, të subjekte të ndryshme nga ato të përcaktuara në pikën 1, shkronja "a", të nenit 14, 5 000 000 lekë;
- e) për shkelje të nenit 14, pika 5, 2 000 000 lekë;
- ë) për shkelje të nenit 14, pika 6, 1 000 000 deri në 1 500 000 lekë;
- f) për shkelje të nenit 14, pika 7, 3 000 000 lekë;
- g) për shkelje të nenit 14, pika 9, 1 500 000 deri në 2 000 000 lekë;
- gj) për shkelje të nenit 14, pika 12, 300 000 deri në 500 000 lekë;
- h) për shkelje të nenit 15, pikat 2 e 3, 100 000 deri në 200 000 lekë;
- i) për shkelje të nenit 15, pika 4, 500 000 deri në 700 000 lekë;
- j) për shkelje të nenit 15, pika 6, 1 500 000 deri në 2 000 000 lekë;
- k) për shkelje të nenit 15, pika 7, 100 000 deri në 150 000 lekë;
- l) për shkelje të nenit 15, pika 9, 500 000 deri në 700 000 lekë;
- ll) për shkelje të nenit 15 pika 10, 500 000 deri në 700 000 lekë;
- m) për shkelje të nenit 16, pika 3, 300 000 deri në 500 000 lekë;
- n) për kryerjen e veprimtarive falsifikuese, sipas përcaktimeve të neneve 12/1, pika 5; 14, pika 13; 15, pika 8; dhe 16, pika 6, 10 000 000 lekë;
- nj) për mosrespektim të kushteve dhe normave teknike në instalimet dhe pajisjet:
  - i) nga 2 500 000 deri në 3 000 000, për rafineritë, impiantet e përpunimit dhe naftësjellësit;

ii) nga 2 000 000 deri në 2 500 000 lekë, për instalimet dhe терминаlet bregdetare;

iii) nga 1 000 000 deri në 1 500 000 lekë, për shoqëritë e tregtimit me shumicë;

iv) nga 500 000 deri në 700 000 lekë, për stacionet e tregtimit të karburanteve dhe njësitë e shitjes të lëndëve djegëse;

o) për ushtrimin e veprimtarisë pa licencë, konform dispozitave të këtij ligji:

i) nga 15 000 000 deri në 20 000 000 lekë, për rafineritë, impiantet e përpunimit dhe naftësjellësit;

ii) nga 10 000 000 deri në 15 000 000 lekë, për instalimet dhe терминаlet bregdetare;

iii) nga 7 000 000 deri në 10 000 000 lekë, për shoqëritë e tregtimit me shumicë;

iv) nga 1 000 000 deri në 1 500 000 lekë, për stacionet e tregtimit me pakicë dhe njësitë e lëndëve djegëse.

2. Gjobat e parashikuara në shkronjat "a" dhe "b", të pikës 1, të këtij neni, jepen nga ministria përgjegjëse për hidrokarburet.

Gjobat e tjera jepen nga inspektorati shtetëror përgjegjës, i ngritur si strukturë e ministrisë përgjegjëse për hidrokarburet.

Në rast se konstatohet mosmarrja e masave për përmirësimin e shkeljes, përsëritje e shkeljes apo kryerje e një shkeljeje tjetër të ndryshme nga shkelja e parë, masa e gjobës rritet me 50 për qind dhe, nëse subjekti gjobitet për herë të tretë, masa e gjobës dyfishohet.

3. Inspektorati shtetëror përgjegjës ka të drejtë që, paralelisht me aplikimin e gjobës, sipas parashikimeve të pikave 1 dhe 2, të këtij neni, të vendosë edhe dënimet plotësuese, si më poshtë:

a) bllokimin e përkohshëm të veprimtarisë, por jo më shumë se 90 ditë;

b) propozimin pranë ministrisë përgjegjëse të hidrokarbureve për fillimin e procedurave të heqjes së licencës së koncesionit, licencës së përpunimit, licencës së tregtimit me shumicë apo licencës së tregtimit me pakicë në stacionet e karburanteve apo njësitë e tregtimit të lëndëve djegëse. Ky dënim plotësues merret në rast se subjekti nuk respekton kushtin e bllokimit të përkohshëm të veprimtarisë ose përsërit shkeljen apo kryen një shkelje tjetër. Në këtë rast, vendimi për heqjen e licencës duhet të merret nga organi kompetent jo më vonë se 90 ditë nga data e konstatimit të shkeljes.

4. Inspektorati shtetëror përgjegjës, në rastet e parashikuara në pikën 1, të nenit 43, të ligjit nr. 10 433, datë 16.6.2011, "Për inspektimin në Republikën e



Shqipërisë”, vendos marrjen e masave urgjente, në përputhje me këtë ligj dhe ligjin për inspektimin.

5. Të ardhurat e përfituara nga gjobat e vëna kalojnë në Buxhetin e Shtetit.

6. Shqyrtimi, marrja e vendimit përfundimtar dhe ankimi ndaj vendimit të ministrisë përgjegjëse dhe inspektoratit shtetëror përgjegjës bëhen në përputhje me ligjin për inspektimin.

Ankimi ndaj vendimit të dhënë për heqjen e licencës së koncesionit, licencës së përpunimit, licencës së tregtimit me shumicë apo licencës së tregtimit me pakicë në stacionet e karburanteve apo njësitë e tregtimit të lëndëve djegëse, sipas nënpikës 3.2, të pikës 3, të këtij neni, bëhet në gjykatë, brenda 30 ditëve nga data e njoftimit të vendimit.

Ekzekutimi i gjobave bëhet në përputhje me parashikimet e ligjit nr. 10 279, datë 20.5.2010, “Për kundërvajtjet administrative”.

7. Pas kalimit të afateve të ankimit administrativ, inspektorati shtetëror përgjegjës publikon vendimin përfundimtar apo një përmbledhje të tij.

Dispozita kalimtare  
(Neni 15 i ligjit nr. 71/2014)<sup>1</sup>

Impiantet përpunuese, të parashikuara në nenin 12/1, të cilat operojnë aktualisht në treg, janë të detyruara që, brenda 6 muajve nga hyrja në fuqi e këtij ligji, të plotësojnë kushtet përkatëse dhe të depozitojnë aplikimin pranë ministrisë përgjegjëse për hidrokarburet për të përfituar licencën e përpunimit.

---

**SHENIM: NDRYSHIMET E FUNDIT JANË BERE ME LIGJIN NR. 71/2014, DATË 10.07.2014, SHPALLUR ME DEKRETIN NR. 8647, DATË 30.07.2014**

---

<sup>1</sup> Në zbatim të Nenit 15, të ligjit nr.71/2014, datë 10.07.2014, shtohet “Dispozita kalimtare”